

# REPUBLIKA Y'U RWANDA



## IKIGO NGENZURAMIKORERE

P.O BOX 7289 KIGALI, Tel: +250 584562, Fax : +250 584563

Email: [arms@rwanda1.com](mailto:arms@rwanda1.com)

Website: [www.rura.gov.rw](http://www.rura.gov.rw)

### ICYEMEZO N° 16/TR-RURA/2008 CYO KUWA 17/12/2008 KIGENA IMIKORERE Y'ABAKORA UMWUGA WO GUTWARA ABANTU MU RWANDA

Inama Ngenzuramikorere mu nama yayo yo kuwa 17 Ukuboza 2008;

Ishingiye ku Itegeko n° 39/2001 ryo kuwa 13/09/2001 rishyiraho Ikigo cy'Igihugu gishinzwe kugenzura Imikorere y'Inzego zimwe z'imirimo ifitiye igihugu akamaro ;cyane cyane mu ngingo zaryo iya; iya mbere, iya 3, iya 5, n'iya 6;

Ishingiye kandi ku Iteka rya Minisitiri n° 4/DC/04 ryo ku wa 07/06/2004 rigena umusanzu urihwa buri mwaka n'inzego zimwe z'imirimo ifitiye Igihugu akamaro;

Imaze kubona ko ari ngobwa kunoza umwuga wo gutwara abantu mu Gihugu;

Ishingiye kandi ku myanzuro y'inama yo ku wa 15/12/2008 yahuje Ikigo Ngenzuramikorere n'abakora umwuga wo gutwara abantu mu Gihugu;

## **ITEGETSE:**

### **Ingingo ya 1: Intego**

Iki cyemezo cyerekeranye n'ibisabwa abifuzza impushya zo gutwara abantu.

### **Ingingo ya 2 : Abo kireba**

Iki cyemezo kireba abantu ku giti cyabo n'ibigo by'ubucuruzi bikora cyangwa byifuzza gukora umwuga wo gutwara abantu.

### **Ingingo ya 3: Ibyo abatwara abantu bagomba kuba bujuje**

Umuntu wese cyangwa ikigo gikora umwuga wo gutwara abantu, agomba kuba abifitiye ubushobozi ndetse n'uruhushya rutangwa n'Ikigo Ngenzuramikorere.

### **Ingingo ya 4: Ibisabwa mu gutanga uruhushya rwo gutwara abantu**

#### **4.1 Ibisabwa umuntu ukora mu buryo butari ubw'ibigo**

Umuntu wifuzza uruhushya rwo gutwara abantu agomba kugaragaza ibi bikurikira ;

- a) icyemezo cy'imiterere y'ikinyabiziga gisabirwa uruhushya, kigaragaza ko icyo kinyabiziga ari kizima (certificat de controle technique);
- b) Ubwishingizi bw'icyo kinyabiziga butari muni y'igihe cy'amezi atandatu (6), kandi hakishingirwa abagenzi ikinyabiziga cyemerewe gutwara bese;
- c) Indangamimerere y'ikinyabiziga (carte jaune);
- d) Kwishyura amafaranga yo kwiyandikisha atangwa rimwe angina n'ibihumbi mirongo itanu (50.000 Frw) ku ma modoka n'ibihumbi makunyabiri (20.000 Frw) ku mapikipiki;
- e) Inyemeza – bwishyu y'amafaranga y'uruhushya ateganywa mu ngingo ya 5.1 y'aya iki cyemezo atangwa buri mwaka kuri konti n° 120.11.27 y'Ikigo Ngenzura Mikorere iri muri Banki Nkuru yu Rwanda (B.N.R );
- f) Kumenyekanisha aho icyo kinyabiziga kizakorera.

Umuyobozi Mukuru w'Ikigo Ngenzuramikorere azagena igihe ntarengwa impushya ziri muri iki cyiciro zizahagarikirwa gutangwa.

#### **4.2 Ibisabwa ikigo**

Ikigo cyifuzza uruhushya rwo gutwara abantu kigomba kugaragaza ibi bikurikira:

- a) Umubare w'ibinyabiziga bya ngombwa kugira ngo uwifuzza uruhushya yemererwe gukora nk'ikigo:

- Ku ma bisi manini n’amatoya, kugaragaza ubushobozi bwo gutwara byibura abantu ijana na mirongo itanu (150) ingunga imwe, haba mu Ntara cyangwa mu Muji wa Kigali;
  - Ku mavatiri, kuba afite amavatiri atari muni y’icumi(10); cyangwa
  - Kuri za pick-up (double cabine), zigomba kuba zitari muni y’umunani (8); cyangwa
  - Ku ma Jeeps agomba kuba atari muni y’atandatu (6);
  - Ku bafite ubwoko buvanze bw’ibinyabiziga (pick-up na jeeps), bagomba kuba bafite byibuze ibinyabiziga umunani (8);
  - Kubafite amapikipiki, agomba kuba atari muni ya makumyabiri (20) na mirongo ine(40) kuri velo moteri;
- b) Buri kinyabiziga kigomba kugira uruhushya hakurikijwe ibivugwa mu ngingo ya kane igika cya mbere cy’iki cyemezo;
- c) Amategeko shingiro (statuts) y’icyo kigo;
- d) Kugaragaza igitabo cy’ubucuruzi “registre de commerce” icyemerera gukora umwuga wo gutwara abantu ;
- e) Kugaragaza umushinga w’ibikorwa (business plan)
- f) Kugaragaza aho icyo Kigo gikorera (parking)
- g) Kwishyura amafaranga ibihumbi mirongo itanu (50,000 Frw) yo kwiandikisha bwa mbere (registration fees) yishyurwa kuri konti n° 120.11.27 y’Ikigo Ngenzuramikorere iri muri Banki Nkuru yu Rwanda (B.N.R );
- h) Inyemeza – bwishyura y’amafaranga y’uruhushya ateganywa mu ngingo ya 5.2 y’aya iki cyemezo atangwa buri mwaka kuri konti yavuzwe haruguru;

### **Ingingo ya 5: Amafaranga atangwa ku mwaka kubadakora mu buryo bw’ibigo**

5.1 Amafaranga asabwa buri kinyabiziga kugirango gihabwe impushya ateye atya :

- a) Amafaranga ibihumbi bitanu (**5.000 frw**) kuri buri tagisi y’ipikipiki;
- b) Amafaranga ibihumbi icumi(**10.000 frw**) kuri buri tagisi vatiri;
- c) Amafaranga ibihumbi cumi na bitanu(**15.000 frw**) ku ma jeeps na pick-up ;
- d) Amafaranga ibihumbi makumyabiri (**20.000 frw**) kuri buri tagisi minibisi zifite kuva ku myanya 12 kugeza kuri 25 ;

- e) Amafaranga ibihumbi mirongo itatu (**30.000 frw**) kuri buri kinyabiziga gifite kuva ku myanya 26 kugeza kuri 32 ;
- f) Amafaranga ibihumbi mirongo itatu na bitanu (**35.000 frw**) kuri buri kinyabiziga gifite imyanya irenze 32.

5.2 Abakora mu buryo bw'ibigo bishyura ibihumbi magana abiri (**200 000 Frw**) ku mwaka

5.3 Amafaranga y'uruhushya atangwa buri mwaka yishyurwa kuri konti n° **120.11.27** y'Ikigo Ngenzuramikorere iri muri Banki Nkuru yu Rwanda( **B.N.R** );

**Ingingo ya 6 : Ibyo abakora uyu mwuga bagomba kubahiriza ;**

- a) Buri mushoramari agomba kubahiriza ibiciro byashyizweho n'Ikigo Ngenzuramikorere ;
- b) Agomba kubahiriza umurongo, parikingi byanditse ku ruhushya rutangwa n'Ikigo Ngenzuramikorere ;
- c) Kutavanga abantu n'imizigo mu kinyabiziga kimwe ;
- d) Kugenzura ko abatwara ibinyabiziga bikora umwuga wo gutwara abantu bubahiriza amabwiriza abagenga ;
- e) Bu muntu wese cyangwa ibigo agomba kugira ikirango n'inyuguti zitandukanya ibinyabiziga bye n'ibyabandi bashoramari bakorera mu gihugu ndetse no mu karere u Rwanda rurimo.
- f) Kwandika no kubahiriza umurongo (ligne) ku binyabiziga bikorera mu Mujyi wa Kigali no mu Ntara.
- g) Gushyikiriza Ikigo Ngenzuramikorere raporo yerekeranye n'ubucuruzi bakora buri mwaka (Financial report/Rapport Financier);
- h) Gushyikiriza Ikigo Ngenzuramikorere raporo ndangamiterere (Technical report/Rapport Technique) y'ikinyabiziga buri mezi atandatu ;
- i) Kwishyura buri mwaka umusanzu ungana na 1% ry'umubare w'ibyacurujwe ateganywa n'Iteka rya Minisitiri n° 4/DC/04 ryo ku wa 07/06/2004.

**Ingingo ya 7: Igihe ntarengwa byo kubona ibyangombwa**

Umushoramari wese washyikirije Ikigo Ngenzuramikorere ibisabwa muri iki cyemezo, ahabwa igisubizo mu minsi cumi n'ine uhereye igihe yatangiye dosiye ye. Byarenza igihe kivugwa muri iyi ingingo agahabwa ibisobanuro.

### **Ingingo ya 8 : Ibihano**

Buri muntu, cyangwa ikigo gikora umwuga wo gutwara abantu kigomba kubahiriza ibikubiye muri iki cyemezo.

Kutubahiriza iki cyemezo bihanishwa :

- a. Ihazabu iri hagati y'amafaranga y'u Rwanda 50.000 kugera kuri 1.000.000 yishyurwa kuri konti y'ikigo Ngenzura Mikorere iri muri Banki Nkuru yu Rwanda(B.N.R) n° **120.11.27**;
- b. Kwamburwa uruhushya rwo gukora mu gihe cy'amezi atatu ;
- c. Kwamburwa uruhushya rwo gukora burundu.

### **Ingingo ya 9 : Ishyirwa mu bikorwa**

Iki cyemezo gitangira gushyirwa mu bikorwa kuwa 1 Mutarama 2009.

### **Ingingo ya 10 : Ivanwaho**

Ingingo z'ibyemezo cyangwa amabwiriza zibanziriza iki kandi zinyuranye nacyo zivanyweho.

**Kigali kuwa 17/12/2008**

**MUKASINE MARIE CLAIRE**

**PEREZIDA W'INAMA NGENZURAMIKORERE**

**Sé**